

# Geisterstunde

De Schorsch unn isch hawwe omm Dinsdaach nooch Ostern su geesche Elf uff unserne Terrass gesotze unn hawwe uns iwver dess scheene Wedder gefreit.

Uff oomol frächt de Schorsch: Honnes, dust du onn Geister glaawe?

Isch habb de Schorsch ooeguggd unn habb de Kobb geschiddeld. Onn Geister glaawe? Ei Schorsch, wie kimmsden doo druff? Dust du onn Geister glaawe?

De Schorsch hott unner sisch geguggd. Isch glaab, ja.

Isch frooch: Du dust onn Geister glaawe? Schorsch, was issen bassierd.

Honnes, dut de Schorsch ze Antwort gewwe, in dere Nacht vor Ostersunndaach, ess iss joo Vollmond gewese unn isch konnt unn konnt nitt oischloofe, war geschwitzt, hadd die Aache uff unn habb onn de Deck nooch dem Raachmelder geguggd, wie bei dem immer widder dess rode Lichtsche oo- unn ausgonge iss. Die Rollläde warn e bissi gekleffd unn dessdeweесe isses in de Schloofstubb nitt gons dunkel gewese. Unn grad wie isch donn uff die Leuchtziffern vunn de Uhr uffem Nachtdisch geguggd unn geseh habb, dass dort vier Nulle sinn, iss vor moine Aache enn weiße Newwel dorsch die Stubb geflooche, hott sisch iwver die Uhr geleeschd unn isch wusst gleisch, dess iss enn Geist. Isch habb dem enn Aachebligg zugeguggd unn wollt grad dess Kättche wecke, die sollt aach emol gugge, awwer donn denk isch, die sieht den nitt unn meckerd, dass isch se geweckt habb unn doo habb ischs gelosse. No ja, Schorsch, saach isch, wahrscheinlich hawwe doi Aache getränt unn dess wars, was derr den Oidruck ...

De Schorsch hott de Kobb geschiddeld. Naa, Honnes, ess war enn Geist. Dess waaß isch, weil der misch mettgenumme hott, no ja, der iss vornewegg unn isch bin hinnerher. Unn uff oomol isses immer heißer unn heißer wormn unn mir sinn innere fremme Stadt gewese, gons onnersders als su e Stadt bei uns. Weil iwver alle Heisser unn Plätz in dere Stadt warn Abdeckunge aus Kunststoff gebaut unn die warn nitt flach, naa, die warn gebaut wie aus lauder Bienewabe ...

Isch habb de Schorsch unnerbroche, bin uffgesprunge, bin in moi Stubb, bin mett emm Stoß Babiern zuriggkumme, habb geblädderd unn donn vorgelese: „Über alle Häuser, Straßen und Plätze der gesamten Stadt ist eine Abdeckung aus festem Plastik gebaut, Wabe an Wabe, so ähnlich wie die Bienen Waben bauen. Die Häuser und auch die Abdeckung selbst sind dadurch gegen Stürme und Starkregen geschützt. Auf den Waben sind schwarze Solarplatten montiert, die Strom erzeugen und unter den Waben ist fruchtbarer Boden ausgebracht, dort wachsen Salat ....

... Salat, Gemies und Kadoffele, rieft doo de Schorsch. Ja, genau dess, was du ewe vorgelese host, dess hott merr de Geist gezeischd. Awwer saach merr mol, wo hodden dess gestonne? Donn habb isch dess aach gelesen, habbs getroomd unn habb gemoond, enn Geist hätt merr dess alles gezeischd.

Mir wars eiskalt iwver de Rigge gelaafe unn isch habb e bissi gezidderd. Schorsch, ess iss enn Geist gewese, der disch in die fremme Stadt gefiehrd hott. Weil was isch derr vorgelese habb, konnst du noch nitt gelesen hawwe. Dess iss aus dem Buch, was isch grad ferrisch geschriwwen habb unn was erst in e paar Woche gedruckd werrd.

Aach dem Schorsch war de Schrecke ins Gesicht geschriwwen. Dess heeßt joo, dass dess werklich enn Geist war, der de erst bei disch unn donn bei misch, doim Kummbeer, kumme iss.

Ja, Schorsch, saach isch, su musses gewese sei. Erst warer bei mir unn donn bei dir.